

Mud Volapüka

Nüm 43

10 febul 2017

Sevols-li, das...

Finot yege da „Jüfavödems pageböls
fa tsyinans ad skeapön sänsuri pö bevüresod“

11. Minister yufa foginik (援交部 - ,Yuánjiāo Bù')

Näisinif: minister dinas foginik.

Plän: zanädanem ludigidik at idavedon bi reiganef Tsyinänik suvo yufon (blinon käledis) länes votik, ab beiädon fikulis ninedik läna okik. Samo, ün novul yela 2011id Tsyinän ilegivon motoranibudis 23 Makedoniyäne. Atos ijenükon brefobüo mijenot ko motoranibud tö provin ‚Gansu‘[,甘肅 ‘], kö mens 20 ideadons, 18 onas äbinons cilus, bai el ‚China Digital Times‘. Pö motoranibud seadöps te 9 äbinons, ab mens 64 pävaibons. Klu bevüresodigebans Tsyinänik äleskanons demü jenöfot, das reiganef igivon Makedoniyäne motoranibudis gudik, du Tsyinän lönik säkäds tefü kosädamedöm e noms sefa dabinons.

12. Drinön tiedi (喝茶 - ,hē chá')


Näisinif: dasäkam fa poldanef.

Plän: Tsyinänans suvo gebons föemoti at, kü blinoys seimani lü poldabür ad dasäkön. Poldanef Tsyinänik famon demü mods düfälik ad dagetön temunodis e koefotis. Büiküno poldans kanons lofön „tiedi“, dat men ukononöv bos. Ab if atos no ubeniköv, ogebons tädotis e mekädami.

13. Züolöd e lükolöd (𠄎 𠄎 - ,wéiguān‘)

Näisinif: vestigam liföfik jenoti seimik.

Plän: vödöd at pagebon as beg ad küpön (lüälükön küpäli lü) jenoti u bevüresodigebani seimik e lükön. Demü küped liföfik at e meug krütik soga mögos skeapön belugami reiganefa.



*Hieroglifs Tsyinänik su skrin sinifons ‚Weibo‘
(naalog Tsyinänik ela ‚Twitter‘).*

14. Dönumenikam [dönumidikam] (𠄎 世 - ,zhuǎnshì‘)

Näisinif: jafam kali bevüresodik nulik pö resodasits klubiälik posä ut büik pekvänedon.

Plän: vödöd at pagebon ad bepenön „lelifikami“ kompenanas pö resodasits kosädanefik posä kals onas pemoükons dub notükam noetis, yegedis tefü yegäds peproiböl. Mimagodan bolitik hiel ‚Kuang Biao‘ [狂 𠄎 ‘] „ilelifikom“ degsna pö ‚Weibo‘. Aipo „dönumidikam“ nulik läükom lü nem bevüresodik nümi lüjonilöl mödoti „lelifikamas“. Dätü (ön dät) mayul 10id yela 2015id länem omik äbinon elu „Uncle Biao Fountain Pen Drawings 47“.

15. Bakastonisevans [sevans bakastonik] (▪ 冢 - ,zhuānjiā')

Näisinif: jäfūdisevans bainunik (lūjinöl), kels gidilükons stadi konömik u nomis sefa badiks бүдү cifodans u бүсиданс remädovik.

Plän: hieroglif balid (▪) de vöd „sevan“ ibinatoy ko hieroglif „ston“ (石), kel pagebon pö vöd „bakaston“. Vödapled (telsinifige vöda) sinifon, das jäfūdisevans at binons solidiku äsvo bakastons (sevabo, fümälik) pö desir okik ad dünöfikön (bönön yufoti) cifode e belugön pöpi.



Hieroglifs Tsyinänik sinifons ,bakastonisevan'.

16. El ,Frisbee Hu' [bovedil flitöl ,Hu'] (▪ ▪ 胡 - ,Fēipán Hú')

Näisinif: ,Hu Xijin', redakal gaseda cifodik ,Global Times'.

Plän: redakal at panemon soiko, bi ai ätuvon dinädis siöfik pö miduns u pökods reiganefa. Samo, timü jov dö ,Bo Xilai' [,薄熙来 '], läxsekretan (läxcifal) paletik zifa ,Chongqing' [,重慶 '], kel picödeton ad fanäbam lifüpik dub remäd, tif e mifrutid nämäda cifodik, hiel ,Hu' ipübom yegedi tiädü „Jenot dö hiel ,Bo' blöfon dareigi lona“. Bevüresodigebans Tsyinänik vuto iblamons yegedi, bi „dareig lona“ sonemik äleadon midunön nenpöno hieli ,Bo Xilai' dü yels degs.

17. Givolsöd pöpe tanedi kleibik (人民一个胶 - ,gěi rénmin yí ge jiāodài')

Näisinif: neletön menis ad bespikön yegädi seimik.

Plän: pos kobjok vifatrenas tö ün yulul yela 2011id, kü mens no läs 40 ideadons e mens ze 200 igetons vunis, balidal hiel ‚Wen Jiabao‘ [‚温家宝 ‘] ilevüdom ad vestigön mijenoti e „givön pöpe pläni“.

Ab cifodans votik lezilo ästeifons klänedön nüni dö kobjok ed isepülons (sio, ebo so) trenavabis idetalöl de pon, ad moükön blöfamedis nekäla mödik. Bi vödeds „taned kleibik“ e „plän“ binons leigatonavödus pö Tsyinänapük, bevüresodigebans isirkülükons fraseodi „givolsöd pöpe tanedi“ ad bepenön steifis reiganefa ad klänedön pökodis e neletön menis ad bespikön jenoti.



„Nek ulelilon vokädi olik is. [pö laf löpik plakata]
Givolsöd pöpe tanedi kleibik. [pö laf donik plakata]“

18. Lampör reigöl (当今皇上 - ,dāngjīn huángshang')

Näisinif: ,Xi Jinping' [,習近平 '], presidan nuik Tsyinäna.

Plän: näinem lekofik at jonädon, das cifal tata noe pivälo fa davälans abgüa pisteton, e labom nämädi ti leteik. Vöded at pablokon pö ,Weibo' sis gustul 21id yela 2014id.



19. Bösin senöfik (敏感瓷 - ,mǐngǎn cí')

Näisinif: vöds peproiböl fa sänsur.

Plän: vöds ,vöd' (瓷 - ,cí') e ,bösin' (敏感 - ,cí') tonons leigo, ab papenons difiko, klu bevüresodigebans Tsyinänik nemons vödis u fraseodis peproiböls valiks, de pösodanems dränäläbas jü mufs reliq peproiböls, as „bösin senöfik“.

20. Län olsik (你国 - ,nǐ guó')

Näisinif: län Paleta kobädimik Tsyinäna.

Plän: Tsyinänanans suvo gebons vödedi „län obik“ spikölo tefü Tsyinäna. Vöded „län olsik“ pagebon ad distükön guveranefi kobädimik de Tsyinäna. Tsyinänanans mödik, kels neplidons tireni paleta kobädimik, iprimons benodistükön vödedis tel at pö tikods e penots bevüresodik okiks.

Parabs

Balna bäldikan äseadom nilü loasid, lä nügolöp zifa lofüdik. Yunan ekosgolom lü atan ed esäkom:

- „Neai ästadob is. Mens kinik lifons pö zif at?“

Bäldikan egesagom etane me säk:

- „Mens kinik ädabinons tö zif, de kel ivegikol?“

- „Etans äbinons mens okiälik e badik. Bio, ebo, demü kod at, idetävob fredölo usao.“

- „Is otüvol otanis.“, egesagom utane bäldikan.

Pos brefüp, votikan ekosgolon lü otöp ed esäkon säki ot:

„Ekömob änu. Sagolös, o bäldikan, mens kimik lifons pö zif at?“

Bäldikan egesagom otmafädo:

- „Gesagolös, o yunan, lio mens äbitons pö zif, de kel ekömol?“

- „Ö!, etans äbinons mens gudik, lotidiälik e nobaladälik. Us flens mödik obik äblibikons, ed äbinos fikulik ad leditön de ons.“

- „Is otüvol otanis», egesagom bäldikan.

Balna bäldikan esäklänedom possone okik verati veütik:

- „Pö men alik lekomip jenon, kel sümedon lekomipi lupas tel. Lup balid jonodon badi: glöt, jalud, pönid, okiäl, stimiäl, lug. Lup telid jonodon gudi: püd, löf, spel, verat, gudöf e ritöf.“

Posson, dibäliko pefäküköl fa vöds lefata, emeditom e poso esäkom:

- „Lup kinik fino vikodon?“

Bäldikan esmililom ed egesagom:

- „Ai lup vikodon, keli satükob.“